



LEKSYON 8

MGA KATUNG DANAN

SA USA KA ASAWA

“Dawaton ba nimo kining babaye ingon nga imong asawa, aron sa pagpuyo uban kaniya diha sa kasugoan sa Dios sa balaan nga dapit sa kaminyoon? Higugmaon ba nimo siya, pisdunggan ug unongan siya diha sa balatian ug sa maayong panglawas; ug magabiya sa uban, magaamping sa imong kaugalingon alang kaniya, samtang ang matag-usa kaninyo may kinabuhi pa”

**Matun-an Nimo Niining Leksyona Ang Mga
Mosunod Nga Mga Katungdanan sa Mga Asawa:**

Paghigugma Ngadto sa Iyang Bana

Paghigugma ug pagtahud kaniya
Pagmasinugtanon ngadto kaniya
Pagmatinud-anon ngadto kaniya

Paghimo sa Panimalay Nga Malipayon

Pag-atiman sa panimalay
Maayong mangluto
Pagkatagbaw ug pagmaya

Maayong Panig-ingnan

Sa sinultihan
Sa mga binuhatan

Paghigugma Ug Pagtudlo sa Mga Anak

PAGHIGUGMA NGADTO SA IYANG BANA

Paghigugma ug pagtahud kaniya

Kon ang ingá lalake pangutan-on, “Unsa ang labaw nga katungdanan sa usa ka asawa?” daghang mga lalake motubag, “Magmasinugtanon sa iyang bana.” Tinuod nga ang Biblia nagatudlo nga ang asawa kinahanglang magmasinugtanon apan malisud niya ang pagsugot sa iyang bana gawas kon gusto gayud siya. Kini naga-agad kon unsa ang kadaku sa iyang paghigugma kaniya.

Ato nang natun-an ang gitudlo sa Biblia nga ang labawng katungdanan sa bana ngadto sa iyang asawa mao ang paghigugma kaniya sama sa paghigugma niya sa iyang kaugalingon. Ingon man usab ang unang katungdanan sa asawa ngadto sa iyang bana ug mga anak.

Tito 2:4. Aron ilang katudloan ang mga batanong babaye sa paghigugma sa ilang mga bana ug mga anak.

Kadaghanan sa imong natun-an sa gugma sa usa ka bana sa iyang asawa mahimong gamiton sa usa ka asawa sa paghigugma niya sa iyang bana.

Kon katungdanan sa usa ka bana ang mohigugma ug mopasidungog sa asawa ingon nga siya maluya, bahin usab sa asawa ang mohigugma ug motahud sa bana ingon nga mas makusog, ang manuglipod, ug ulo sa pamilya. Tinuod, ang bana kinahanglang mogawi sa kaagi nga siya tahuron sa iyang asawa. Apan, bisan daghan ang iyang sayop, ang asawa kinahanglang motahud kaniya ingon nga bana.



Efeso 5:33. Ang asawa kinahanglan magatahud sa iyang bana.

Ang asawa magapakita nga iyang gitahud ang iyang bana pinaagi sa iyang mga sinultihan ug mga binuhatan. Ang mga masakit nga mga pinulongan sa bana ug asawa walay dapit sa usa ka kristohanong kinabuhi. Bisan ang pagsinudyay sa usag-usa mahitungod sa ilang kapakyasan. Ang asawa kinahanglan dili magabiaybiay o himoong kataw-anan ang iyang bana. Ipasigarbo niya ang iyang bana sa uban ug dili magbagolbol sa iyang mga sayop. Dili niya tamayon o korehian siya sa atubangan sa kadaghanan.

Buhata Kini

1. Unsa ang labawng katungdanan sa usa ka asawa?
.....
2. Sag-uloha ang Tito 2:4.
3. Unsaon sa pagpakita sa asawa ang iyang pagtahud sa iyang bana?
.....
.....

Pagmasinugtanon ngadto kaniya

Kon ang asawa nahigugma ug nagatahud sa iyang bana ingon nga pangulo sa panimalay, magmasinugtanon usab siya kaniya.

Colosas 3:18. Mga asawa, pasakop kamo nga masinugtanon sa inyong masigkabana, ingon nga maoy angay diha sa Ginoo.

Ug usab, diha sa nahisulat sa Tito 2:4,5 makita nato kini: “. . . ug masinugtanon sa ilang masigkabana.”

I Corinto 11:3. Ang ulo sa matag-usa ka lalake mao si Cristo, ug ang ulo sa babaye mao ang iyang bana.

I Pedro 3:1. Ingon man usab kamong mga asawa, magpasakop kamo nga mga masinugtanon sa inyong kaugalingong mga bana.


Efeso 5:22. Kamong mga asawa, kinahanglan magpasakop kamo nga masinugtanon sa inyong masigkabana ingon nga sa Ginoo.

Buhata Kini

4. Sag-uloha ang Colosas 3:18.

Pagmatinud-anon ngadto kaniya

Ang asawa, ingon man usab ang bana, nagasaad sa “pagbiya sa uban” sa diha nga gihiusa siya sa iyang bana diha sa kaminyoon. Kinahanglang iyang tumanon ang iyang saad ug magmatinud-anon sa iyang bana. Ang Dios magasilot sa asawa nga magapanapaw ingon man usab sa bana.



Ang bana ug ang asawa nagadawat sa usag-usa “sa kadatu ug kakabus, sa kaayohan ug sa kalisdanan, sa kasakit ug sa kabaskog hangtud sa kamatayon.” Kinahanglan magakauban sila sa panahon sa kalisdanan ug dili mosibog. Ang pailub, pagkamasinabuton ug pagdasig sa usa ka asawa, makatabang sa bana sa panahon sa kalisdanan nga siya lamang unta ang magapas-an.

Ang Proverbio 31:10-31 dunay daghang mga butang nga gisulti mahitungod sa usa ka maayong asawa. Ang asawa kinahanglan adunay katakus. Sa laing pagkasulti, magakinabuhi siya sa usa ka sulondon nga kinabuhi. Magbinuotan siya, magmatinumanon, ug kasaligan. Magmatinud-anon siya sa iyang bana sa hunahuna ug sa iyang pagbuhat. Dili siya magadani sa pagtagad sa ubang lalake. Maayo gayud sa usa ka bana nga makabaton siya ug bug-os nga pagsalig sa iyang asawa ug masayud nga “siya magabuhat gayud kaniya sa maayo ug dili sa dautan sa tibuok nga mga adlaw sa iyang kinabuhi.”

Proverbio 31:10-12. Kinsay makakaplag sa usa ka babaye nga takus? Kay ang iyang bili labaw pa kay sa mahal nga mga bato. Ang kasingkasing sa iyang bana nagasalig kaniya Siya nagabuhat kaniya sa maayo ug dili sa dautan sa tibuok nga mga adlaw sa iyang kinabuhi.

Buhata Kini

5. Sa panahon sa kasal, giunsa man pagdawat sa bana ug asawa ang usag-usa?

.....

.....

.....

.....

PAGHIMO SA PANIMALAY NGA MALIPAYON

Pag-atiman sa panimalay

Usa ka dapit sa babaye ang pag-atiman sa panimalay ug paghimo niini nga malipayon.

I Timoteo 5:14. Buot ko nga managpamana ang mga babayeng balo nga mga batan-on pa, managpanganak sila, managdumala sa ilang panimalay.

Ang pagdumala sa panimalay usa ka dakung buluhaton alang sa usa ka babaye, ug kon iya kining mahimo nga malampuson ang iyang bana mopauli nga malipayon sa ilang balay. Kon sa pagpauli sa iyang bana ug iyang makita nga ang ilang balay hugaw ug walay pagkaon nga giandam, tingali matintal siya sa pag-adto sa laing dapit diin mahusay ang iyang panghunahuna. Ang asawa adunay mga laing butang nga buot niyang pagabuhaton apan ang pagdumala sa iyang panimalay maoy usa sa iyang unang kinahanglan nga buhaton. Walay bisan unsang buluhaton sa gawas nga labaw pa kamahinungdanon kay sa panimalay.

Buhata Kini

6. Unsay usa ka mahinungdanon nga buluhaton sa usa ka asawa?

.....
.....

Maayong mangluto

Adunay panultihon nga nag-ingon: “Ang dalan paingon sa kasingkasing sa tawo mao ang iyang tiyan.” Ang bana magadayeg sa usa ka asawa nga magaadam kaniya ug lamian nga pagkaon. Ang asawa nga tapulan mag-andam ug lain-laing pagkaon nga mogasto ug panahon, mahibulong tingali nga ang iyang bana wala kalipay sa ilang panimalay. Pakan-a ang inyong bana pag-ayo. Pagtuon sa pagluto ug nagkalain-laing pagkaon.

Proverbio 31:14, 15. Siya nagadala sa iyang tinapay gikan sa halayo. Siya mobangon usab samtang gabii pa, ug nagahatag sa kalan-on sulod sa iyang panimalay.

Ang kabaskog sa pamilya naga-agad kon giunsa nimo sila pagpakaon. Busa, pagtuon ug unsay angay sa ilang gikinahanglan ug unsaon nimo sila paghatag ug maayong pagkaon nga igo ang imong salapi alang niini.

Buhata Kini

7. Unsay kahulugan sa panultihon nga nag-ingon, “Ang dalan paingon sa kasingkasing sa tawo mao ang iyang tiyan?”

.....

.....

.....

Pagkatagbaw ug pagmaya

Matuod nga limitado usahay ang salapi sa asawa alang sa igasto sa pagkaon. Dili gayud siya mogasto ug salapi nga labaw pa sa kinitaan sa iyang bana. Ug dili siya moreklamo kanunay kon ang ubang asawa daghan ug ikagasto. Ang pagkatagbaw sa dapit diin gihatag sa Dios kanimo usa ka daku ug maayong hiyas.

Hinumdumi nga gibuhat sa Dios ang babaye ingon nga katabang sa lalake. Hinungdanon ang dapit sa usa ka magtatabang. Makatabang ikaw sa imong bana pinaagi sa imong pagmaya ug pagabiabi kaniya. Kon siya kanunay makadungog ug mga reklamo ug mga yawyaw, dili siya malipay.

Proverbio: 21:9. Maayo pa ang pagpuyo diha sa pamagangan sa atop sa balay, kay sa pakig-uban sa usa ka makigawayong babaye sa usa ka halapad nga balay.

Buhata Kini

8. Unsaon sa asawa sa pagkahimong magtatabang?

.....

.....

MAAYONG PANIG-INGNAN

Sa sinultihan

Ang paagi sa sinultihan sa asawa mahimong makahatag ug kalipay sa iyang bana ug usa ka maayong panig-ingnan sa tanan nga nakaila kaniya. Apan duna usay mga asawa nga ang ilang sinultihan makasamok sa tanang makadungog kaniya. Ang yawyawan, reklamador, inggit nga tingog makapalibog sa tanang sakop sa panimalay ug makapasubo sa matag-usa. Ang mga anak nga midaku nga kanunay makadungog niining klaseha sa sinultihan mogamit usab niini sa ila usab nga mga anak.

Ang Biblia nagapahimangno sa mga babaye mahitungod sa mga pagtabi ug pagpangwitwit, nga magahisgut mahitungod sa ubang tawo ug pagpanghilabut sa ilang mga buhat. Sa laing bahin, ang maayo, malomong mga pulong ug maayong panghunahuna sa asawa adunay gamhanang impluwensya sa tibuok pamilya. Ug ang pag-ampo sa inahan alang sa iyang panimalay dili gayud mahikawan ug tubag.

Proverbio 31:26. Siya nagabuka sa iyang baba uban ang pagkamanggialamon; ug ang balaod sa pagkamaloloy-on maoy anaa sa tumoy sa iyang dila.

Buhata Kini

9. Sag-uloha ang Proverbio 31:26.

Dinhi sa mga bersiculo sa Proverbio makita nato nga ang maayong asawa dili tapulan. Iyang giatiman ang balay ug nagahatag ug pagkaon alang sa tanan. Nagabuhat siya pinaagi sa iyang kamot sa pagpanahi. Kinahanglan nga ang babaye mahibalo gayung manahi ug igo, nga makapahimo sa biste sa iyang panimalay nga maayong pagkabutang. Kon maayo siyang motahi, makahimo siyang mga bag-ong biste nga mas barato pa kay sa paliton.

Probervio 31:13, 21, 22, 27. Siya nagapangita ug balhibo sa carnero ug lanot sa lino, ug sa kina-bubut-on nagabuhat uban sa iyang kamot. Siya dili mahadlok sa nieve alang sa iyang panimalay; kay ang iyang sulod-balay gibistihan sa mapula. Siya nagabuhat alang sa iyang kaugalingon ug mga alfombra; Ang iyang saput lino nga manipis ug purpura. Siya nagasud-ong ug maayo sa mga paagi sa iyang sulod-balay, ug dili mokaon sa tinapay sa pagkatapulan.

Ang babaye nga nabasa nato sa Proverbio nagabuhat diha sa uma ug may abot nga ikabaligya. Dili kini ang una niyang katungdanan apan usa kini ka dakung panalangin kon ang asawa makahimo sa iyang buluhaton sulod sa balay ug makahimo pa gayud sa mga buluhaton sa gawas sa balay!

Siya maayo, maalamon ug manggihatagon. Nagatabang Siya sa mga kabus. Nagahatag ang Dios kaniya sa kusog ug dungog tungod kay nahadlok siya sa Ginoo ug nagtuman Kaniya. Kining katahum sa kinaiya labaw pa kamaayo kay sa matahum nga dagway ug madanihong pamarug.

Proverbio 31: 20, 24, 25. Ginatuv-od niya ang iyang kamot ngadto sa mga kabus; siya nagabuhat ug mga saput nga lino ug nagabaligya kanila. Kusog ug kahalangdon mao ang iyang sapot ug siya malipay sa panahon nga moabut.

Proverbio 31:30. Ang katahum malimbongon ug ang kaanyag kakawangan lamang apan ang usa ka babaye nga mahadlok kang Jehova, siya pagadayegon.

Buhata Kini

10. Sag-uloha ang Proverbio 31:30.
11. Unsa man ang ubang mga butang nga gitudlo sa Proverbio 31 mahitungod sa usa ka maayong asawa?

.....

.....

.....

.....

PAGHIGUGMA UG PAGTUDLO SA MGA ANAK

Ang asawa adunay pinasahe nga kaakohan sa paghigugma, pagtudlo ug pagiya sa mga anak, tungod kay kanunay siyang nakig-uban kanila kay sa iyang bana. Miingon si Pablo nga ang pagtoo ni Timoteo maoy bunga sa pagtudlo sa iyang inahan ug apohang babaye (II Timoteo 1:5). Ang gugma ni Ana sa Dios maoy naga-hatud kaniya sa pagtugyan sa iyang anak ngadto sa buluhaton sa Dios. Ang maayong pagtudlo sa inahan ni Moises maoy nakahatag kaniyang maayong hukom sa pag-alagad sa Dios sa dihang daku na siya.

Ang babayeng makatuman niini mapasidunggan gayud.

Proverbio 31:28. Ang iyang mga anak mobangon, ug magatawag kaniya nga bulahan. Ang iyang bana usab, ug siya nagadayeg kaniya.



Buhata Kini

12. Sag-uloha ang Proverbio 31:28.
13. Pag-ampo alang sa mga babaye ug asawa sulod sa imong panimalay nga ang Dios magatabang sa usag-usa kanila nga mahimong asawa sumala sa gihulagway sa Biblia sa Proverbio 31.
14. Kon ikaw usa ka asawa, susiha ang imong kaugalingon sa kada punto niining leksyona. Pangayo sa Ginoo aron sa pagtabang kanimo sa mga punto diin ikaw mahuyang.
15. Itanding ang imong mga tubag sa makita sa sunod nga pahina.
16. Sulati ang imong rekord sa estudyante alang sa Leksyon 8.

PAHALIPAY!

Natapus na nimo ang duha sa tulo ka bahin niining kursoha. Karon, sunda ang pahimangno sa katapusan sa mga pangutana sa leksyon 8 alang sa imong rekord sa estudyante.

Mga Tubag sa Leksyon 8

Kon ang imong hustong tubag gikan sa 6 ngadto sa 7, markahi ang imong grado ug labing maayo; 5, maayo; 4, kasarangan. Kon mokubos sa 4 ang imong hustong tubag, basaha pag-usab ang leksyon.

1. Paghigugma sa iyang bana.
3. Pinaagi sa iyang sinultihan ug sa iyang binuhatan.
5. Sa kadatu ug kakabus, sa kaayohan ug sa kalisdanan, sa kasakit ug sa kabaskog, hangtud sa kamatayon.
6. Pag-atiman ug pagdumala sa panimalay
7. Ang bana malipay sa asawa nga magandangam ug maayong pagkaon alang kaniya.
8. Pinaagi sa pagmaya ug pagkatagbaw.
11. Siya maayog gawi ug kugihan. Magasulti siya sa kaalam ug nagakahadlok sa Ginoo.

Pila ang imong hustong tubag

Grado